

Pilersaarusiorneq aamma nunaminertat atorneqartarnerat pillugit Inatsisartut peqqussutaat

Areaalit (nunaminertat/imartat) atorneqarnerat, illoqarfiit allilerneqarneri sanaartorfigineqarnerilu pillugit Kalaallit Nunaannut inatsit pillugu Inatsit nr. 612, 23. december 1980-imeersu-mi § 1 tunngavigalugu aalajangersarneqarput:

Kapitali 1

Peqqussutip siunertaa

§ 1. Inatsisartut peqqussutaata siunertaraa nunap nunaminertaasa inuiaqatigiit eqqarsaatigalugit ataatsimut naliliineq tunngavigalugu atorneqarnissaat qularnaarneqassasoq. Siunertaq taanna anguneqassaaq,

- 1) pinngortitap illersorneratigut,
- 2) inuiaqatigiit tungaanniit isigalugu naleqquttumik nunaannaap aamma sanaartukkat inuit pilersitaasa akornanni immikkoortiterinikkut,
- 3) nunap nunaminertaasa pilersaarusiorneq inuussutissarsiornikkut, inooqatigiinnikkut avatangiisitigullu iluaqutaasumik ineriartornermik siursaaussaaq naapertorlugu atorneqarnerisigut,
- 4) innuttaasut nunaminertat atorneqarnissaat pillugu pilersaarusiornermi peqataatinnerisigut,
- 5) nr. 1-imiit 4-imut naapertorlugit aalajangiussinerit sanaartorfissanut aningaasaqarnermillu pilersaarusiornermut ataqatigiissinnerisigut.

Kapitali 2

Oqartussat akisussaasut

§ 2. Inatsisartut peqqussutaanni matumani maleruagassat naapertorlugit nunap nunaminertaasa Inatsisartut peqqussutaata siunertaanut naapertuuttumik atorneqarnissaat, pilersaarusiornikkut qulakkeerniassallugu Naalakkersuisut pisussaapput.

§ 3. Naalakkersuisut nunaminertat atorneqarnissaat pillugu maleruagassanik aammalu sanaartorfissanik pilersaarusiornernerup ataatsimoortup imarisassai, ilusissaa piviusunngortinnissaalu pillugit maleruagassanik erseqqinnerusunik aalajangersaassapput aammalu kommunalbestyrelsinut ilitersuinikkut ikiutissallutik.

Kapitali 3

Nuna tamakkerlugu pilersaarusiorneq

Nuna tamakkerlugu pilersaarusiornernerup suliarineqarnissaa

§ 4. Naalakkersuisut nuna tamakkerlugu sanaartorfissanik pilersaarusionerup ataatsimoortup suliarineqarnissaa aammalu misissuinerit tamatumunnga pisariaqartut ingerlanneqarnissaat qulakkiissavaat.

Imm. 2. Naalakkersuisut nuna tamakkerlugu qarasaasiaq atorlugu, nunami sumiiffinnut tamanut paasissutissanik katersuiffimmik, pilersaarusanut isaaffittalimmik suliaqartitsissapput.

1) Naalakkersuisut suliassaqaqfinnut oqartussaasui aamma kommunit nunaminertat pillugit aalajangiussanit aalajangersimasunut atugassanngortitsinerit aamma nunaminertanik atuinissamik killilersuinerit pillugit paasissutissanik, imm. 2 naapertorlugu qarasaasiaq atorlugu, nunami sumiiffinnut tamanut paasissutissanik katersuiffimmut pilersaarusanullu isaaffittalimmut Naalakkersuisut suliarititaannut, saqqummiisassapput.

2) Nunaminertat nunami sumiiffiini killiliinernik kiisalu nunaminertap pineqartup inatsisitigut aalajangersakkanut pineqartunut ilaaffiinnut innersuussinernik paasissutissat imaqaassapput.

Imm. 3. Naalakkersuisut tamatumunnga pisariaqartillugu kisiannili peqqussutip matuma atuutilerneranit naatsorsukkamik minnerpaamik ukiut sisamakkaarlugit kommuninut pilersaarusionermi Namminersornerullutik Oqartussat soqutigisaat takussutissiortassavaat.

§ 5. Pisortat oqartussaasut kiisalu pisortat ingerlatassaannik ingerlatsinissamik akuersisummik pigisaqartut aamma suliffeqarfiit taakkununga assingusut, nuna tamakkerlugu pilersaarusionermi atugassanik misissuinerit, pilersaarusionerit aamma sanaartugassatut aalajangiussat annertunerusut piareersarneqarneri ingerlanneqarnerilu pillugit Naalakkersuisunut nalunaaruteqartassapput.

§ 6. Naalakkersuisut qularnaassavaat nuna tamakkerlugu pilersaarusionerup kommuninut pilersaarusionerup, tak. kap. 4, aamma suliassaqaqfinnut pilersaarusionerup ataqatigiississagaa.

Imm. 2. Naalakkersuisut nuna tamakkerlugu pilersaarusionerup siunertai qanorpiarlugu imaqarnera pillugit tamanut ammasumik oqallittoqalernissaa siunertaralugu paasititsiniaanermik suliaqarneq aallartissavaat.

§ 7. Naalakkersuisut nuna tamakkerlugu pilersaarusionerup pillugu Inatsisartunut ukiumoortumik nassuiaateqartassapput.

§ 8. Naalakkersuisut nuna tamakkerlugu pilersaarusionermut soqutiginaatillit nakkutiginnissaannut, ilanngullugit Namminersornerullutik Oqartussat suliassaqaqfinnut soqutigisaat, kommuninut pilersaarusionermut aalajangersakkanik erseqqinnerusunik atuuttussanngortitsisinnaapput (nuna tamakkerlugu pilersaarusionermut malitassiat).

Imm. 2. Sumiiffiup ilaanut aalajangersimasumut nuna tamakkerlugu pilersaarusionermut malitassiaq sukumiisunik aalajangersagartaqartoq, kommunimut pilersaarutituulli inatsisitigut sunniuteqartinneqassasoq Naalakkersuisut aalajangiisinnaapput, tak. §§ 21-mit 23-mut.

Imm. 3. Imm. 1 malillugu nuna tamakkerlugu pilersaarusionermut malitassiat akuerisaasut minnerpaamik ukiut sisamakkaarlugit iluarsaanneqartarnissaat Naalakkersuisut qularnaassavaat.

§ 9. Pisortat pilersaarusionermik ingerlatsinerat aamma sanaartugassanik aalajangiussinerit nuna tamakkerlugu pilersaarusionermut naapertuuttumik ingerlanneqassapput.

Imm. 2. Nuna tamakkerlugu pilersaarusionerup piviusunngortinnissaa qulakkeerniarlugu Naalakkersuisut kommunalbestyrelsi imarisassaa erseqqinnerusumik taallugu § 19 malillugu kommunimut pilersaarusoqqusinnaavaat kommunimulluunniit pilersaarummut tapiliussamik suliaqaaqqusinnaallugu imaluunniit nammineerlutik sumiiffimmut pineqartumut aalajangersakkat maleruagassiisut suliarisinnaallugit.

Imm. 3. Kommunalbestyrelsi nuna tamakkerlugu pilersaarusionermut malitassianut atuuttunut

imaluunniit inatsisinut allanut il.il. uniuuttumik kommunimut pilersaarusiortat imaluunniit kommunimut pilersaarummut tapiliussamik suliaqarpat, kommunimut pilersaarut naalagaaffimmit oqartussaasumit imaluunniit Namminersornerullutik Oqartussani oqartussaasumit oqartussaaffimmut pineqartumut suliaasaqarfirmut akisussaasuusumit akuerineqaqqaassaaq.

Nuna tamakkerlugu pilersaarusiortanermik qularnaallisitsineq

§ 10. Kommunimut pilersaarutissatut siunnersuut imaluunniit kommunimut pilersaarutit allanngortinnissaanut siunnersuut, pissutsinut immikkut isigineqartariaqartunut naalagaaffiup oqartussaasuinit imaluunniit Namminersornerullutik Oqartussat oqartussaasuinit isumagineqartunut akertuissimappat, oqartussaasoq pineqartoq akertuissuteqarnissamut piffissaliussap naannginnerani, tak. § 15, imm. 3, siunnersuummut akertuissuteqassalluni pisussaavoq.

Imm. 2. Pilersaarutit imarisaa pillugu kommunalbestyrelsi oqartussaasullu pineqartup akornanni isumaqatigiittoqaqqaartinnagu kommunalbestyrelsi siunnersuut inaarutaasumik akuersissutigisinnaangila.

Imm. 3. Taamatut isumaqatigiinnissaq anguneqarsinnaangippat pilersaarutissatut siunnersuut Naalakkersuisunut saqqummiunneqassaaq. Pilersaarutissatut siunnersuut Naalakkersuisunit akuerineqarpat aatsaat, Inatsisartut peqqussutaat manna naapertorlugu pilersaarut inatsisitigut sunnuteqalersinnaavoq.

§ 11. § 10 naapertorlugu akertuissuteqarnermut atatillugu Naalakkersuisut aalajangiisnaapput, siunnersuut imaluunniit siunnersuutit tamanut saqqummiunneqartut, kommunalbestyrelsi siunnersuummik saqqummiussineraniit ukiut marluk tikillugit § 23, imm. 3-mi taaneqartut sunnuteqassasut. Tamanna pillugu aalajangiineq Naalakkersuisunit nalunaarutigineqassaaq.

Imm. 2. § 10, imm. 3 malillugu akuersissuteqarnermut atatillugu Naalakkersuisut pilersaarutissatut siunnersuummi tamanut saqqummiunneqartumi allannguuteqartitsisinnaallutillu ilassuteqartitsisnaapput.

§ 12. Nuna tamakkerlugu pilersaarusiortanerp naammassineqarnissaa qulakkeerniarlugu aamma allatigut pisariaqarsorineqarpat Naalakkersuisut aalajangersinnaavaat, kommunalbestyrelsi Naalakkersuisunit piffissaliussaq naatinagu kommunimut pilersaarummut allannguummik, Naalakkersuisunit erseqqinnerusumik taaneqartunik imaqartumik suliaqartitsissasoq.

Imm. 2. Imm. 1 malillugu piffissaliussaq kommunalbestyrelsimit eqqortinneqangippat, kommunalbestyrelsi akiligaanik kommunimut pilersaarutit allannguutissaa namminneerlutik suliaritinniarlugu Naalakkersuisut aalajangersinnaapput. Taamatut pisoqartillugu kommunalbestyrelsi §§ 13, aamma 23, imm. 2 naapertorlugit pisinnaatitaaffi Naalakkersuisut pisinnaatitaaffigilissavaat. Pilersaarut §§ 15-imi, 17-imi aamma 20-imi malerugassat malillugit Naalakkersuisut suliaritissavaat.

Kapitali 4

Kommunimut pilersaarusiortanerp

§ 13. Kommunilbestyrelsi kommuneqarfimmi nunaminertanut atuissamut kommunimut pilersaarusiortitsinissaq pisussaaffigaa. Tamanna pissaaq kommunimi nunaminertaqassutsimik, pinngortitap pissarititaanik aningaasasaqarnermillu ataatsimut naliliineq, innuttaasut amerlassusaannut inuussutissarsiornikkullu ineriartornermut anguniakkat aamma pisortat suliaasaqarfiinut pilersaarusiortanerp kiisalu Inatsisartut peqqussutaannut matumunnga siunertaasutaallaavigalugit, tak. § 1.

Imm. 2. Kommunimut pilersaarut imaqassaaq:

- 1) Immikkoortoq kommunimut pilersaarutit tunngavigisaannik aamma kommunip ineriartornissaanut anguniakkanut nassuiaataasoq.
- 2) Immikkoortoq kommunip ataatsimut pingaarnertut ilusiligaaneranut kiisalu kommunip illoqarfisa, nunaqarfisa assigisaasalu ataasiakkaat ilusiligaanerannut tunngasoq.
- 3) Immikkoortoq aalajangersakkanik imaqartoq, tassani aalajangersarneqassallutik
 - a) sumiiffiup ilaanni aalajangersimasuni ataasiakkaani nunaminertanik atuinissamut aamma illuliortiternissamut aalajangersakkat pingaarnerit, aamma
 - b) sumiiffiup ilaanni aalajangersimasuni ataasiakkaani nunaminertanik atuinissamut aamma illuliortiternissamut aalajangersakkat sukumiisut.
- 4) Kommunalbestyrelsip nunaminertanik atugassiisarnissaanut aalajangersakkat.

Imm. 3. Kommunimut pilersaarut nuna tamakkerlugu pilersaarusionermut malitassianut imaluunniit Naalagaaffiup aamma Namminersornerullutik Oqartussat suliaasaqarfinnut piler-saarusionerinit akerliussanngilaq.

§ 14. Kommunalbestyrelsi kommunimut qinigaaffiup qiteqqutinnginnerani kommunimi pineqartumi kommunimut pilersaarusionermut periaasissamik suliaqassaaq.

Imm. 2. Pilersaarusionermut periaasissaq imm. 1-imi taaneqartoq kommunimut pilersaarut kingullermik iluarsaanneqartoq malillugu pilersaarusioneq ingerlanneqarsimasoq, kommunalbestyrelsip ineriartornermut naliliinera periaasialu pillugit paasissutissanik kiisalu makkua pillugit aalajangiinermik imaqassaaq,

- 1) kommunimut pilersaarummik tamakkiisumik iluarsaassisoqassanersoq, imaluunniit
- 2) kommunimut pilersaarummi sammisat ilaannik ataatsimik arlalinnilluunniit iluarsaassisoqassanersoq, imaluunniit
- 3) kommunimi nunami sumiiffinnut tunngasunik iluarsaassisoqassanersoq, imaluunniit
- 4) kommunimut pilersaarut ukiunut sisamanut nutaamik piffissalikkamik akuersissutigineqassanersoq.

Kapitali 5

Kommunimut pilersaarutininik suliaqartitsineq

Kommunimut pilersaarutissatut siunnersuutit tamanut saqqummiunneqarneri

§ 15. Kommunimut pilersaarutissatut siunnersuut akuersissutigineqareerpat kommunalbestyrelsip siunnersuut tamanut saqqummiutissavaa. Kommunalbestyrelsi siunnersuutininik arlalinnik qinigassiilluni tamanut saqqummiussisinnaavoq.

Imm. 2. Kommunalbestyrelsimi ikinnerussuteqartut kikkulluunniit kommunimut pilersaarutissatut siunnersuummut akuerineqartumut allatut isumaqarnertik kommunalbestyrelsip aalajangiinerinik allattuiffimmut ilannguteqqullugu piumasaqarsinnaavoq. Saqqummiussinerup peqatigisaanik ikinnerussuteqartut pineqartut allatut isumaqarnerat, ikinnerussuteqartut tamatumunnga tunngavilersuutitut naatsumik allassimasaat ilanngullugu, kommunalbestyrelsip saqqummiutissagaa ikinnerussuteqartut piumasarisinnaavaat.

Imm. 3. Kommunimut pilersaarutissatut siunnersuut, imm. 2 naapertorlugu ikinnerussuteqartut allatut isumaqarnerannik ilanngussartaqartoq, innuttaasunut tikikkuminartumut inissillugu, minnerpaamik sapaatit akunnerini 12-ni kikkunnut tamanut takusassiarineqassaaq. Tamanut saqqummiussineri

kommunimi saqqummiussisoqartillugu nalinginnaasumik periaasiusartut atorneqassapput. Kommunimut pilersaarutissatut siunnersuut kommunip nittartagaani imaluunniit qarasaasiaq atorlugu, nunami sumiiffinnut tamanut paasissutissanik katersu-iffimmi takuneqarsinnaassaaq.

Imm. 4. Tamanut saqqummiussinermi imm. 3 naapertorlugu oqaaseqaateqarnissamut siunnersuummullu allannguutissatut siunnersuuteqarnissamut piffissarititaasoq nalunaarutigineqassaaq.

Imm. 5. Kommunalbestyrelsip kommunimut pilersaarutissatut siunnersuutip siunertai imarisaalu pillugit tamanut ammasumik oqallittoqalernissaa siunertaralugu paasititsiniaaneq ingerlatissavaa.

Imm. 6. Tamanut saqqummiussinermut peqatigitillugu siunnersuut Naalakkersuisunut aamma oqartussanut kommunimut pilersaarutissatut siunnersuutikkut immikkut sunniuteqarfigineqartussanut nassiuuneqassaaq. Akerliliissuteqarnissamut oqaaseqaateqarnissamullu piffissarititaasoq, tak. imm. 3, nalunaarutigineqassaaq.

Imm. 7. Kommunalbestyrelsi kommunimut pilersaarutissatut siunnersuutip tamanut saqqummiunneranut atatillugu pilersaarummik saqqummiunneqartumik tunniussinermut akit-suummik akileeqquisinnaavoq.

Kommunimut pilersaarutissatut siunnersuutininik inaarutaasumik akuersineq

§ 16. § 15, imm. 3 naapertorlugu piffissaliussaq naappat, kommunalbestyrelsip kommunimut pilersaarutissatut siunnersuut nutaamik suliareqqillugu, siunnersuut inaarutaasumik akuersissutigisinnaavaa. Tamatuma peqatigisaanik tusarniaanerp inglerlanerani akertilissutit allannguutissatullu siunnersuutit tiguneqartut suliareqassapput.

Imm. 2. Kommunalbestyrelsip imm. 1 naapertorlugu kommunimut pilersaarutissatut siunnersuummik inaarutaasumik akuersissuteqarnerani, kommunalbestyrelsi siunnersuummi tamanut saqqummiunneqarsimasumi allannguuteqartitsisinnaavoq. Allannguutit annertuppata imaluunniit pilersaarutip imarisaanut tunngaviusunut akerliuppat, kommunimut pilersaarutis-satut siunnersuut allannguuteqartoq, akertilissuteqarnissamut sapaatit akunnerinik minner-paamik 6-nik piffissaliussilluni nutaamik tamanut saqqummiunneqassaaq.

Kommunimut pilersaarutit inaarutaasumik akuersissutigineqartut tamanut nalunaarutigineqarneri

§ 17. Kommunalbestyrelsi kommunimut pilersaarutissatut siunnersuutip inaarutaasumik akuersissutigineqareernerani pisariaqanngitsumik kinguarsaanertaqanngitsumik tamanut nalunaaruteqassaaq. Nalunaarummi tamanut saqqummiunneqartumi paasissutissiissutigineqassaaq kommunimut pilersaarut siunnersuummit saqqummiunneqareersumit immikkoortuni sutigut allaassuteqarnersoq.

Imm. 2. Kommunalbestyrelsip kommunimut pilersaarutip tamanut saqqummiunneqartup assinga ataaseq Naalakkersuisunut aamma oqartussanut § 15, imm. 6 malillugu pilersaarutissatut siunnersuutip tamanut saqqummiunneqarnera pillugu allakkatigut nalunaarfigineqarsimasunut nassiuutissavaa.

Imm. 3. Kommunimut pilersaarut tamanut saqqummiunneqartoq kommunip qarasaasiaq atorlugu, nunami sumiiffinnut tamanut paasissutissanik katersuiffimmut, tak. § 4, ilanngutissavaa, taamaalilluni kikkunnit tamanit pissarsiarineqarsinnaassalluni.

Imm. 4. Pilersaarutissatut siunnersuut inaarutaasumik akuersissutigineqarsimasooq atorunnaassaaq, pilersaarutissatut siunnersuutip § 16 naapertorlugu inaarutaasumik akuersissutigineqarneraniit, imm. 1 naapertorlugu sapaatit akunneri 12-it qaangiutsinnagit tamanut nalunaarutigineqarsimanngippat.

Kommunimut pilersaarutininik pisoqalitsaaliuineq

§ 18. Kommunalbestyrelsip pisariaqalernerani kommunimut pilersaarut nutartertassavaa.

Imm. 2. Kommunimut pilersaarummi annertuumik allannguuteqartitsereernermi, kikkunnit tamanit aamma Naalakkersuisunit atorineqarsinnaasunngorlugit pilersaarutip imarisai pillugit takussutissiornissaq aamma aalajangersakkat atuuttut ataatsimut allanneqarnissaat kommunalbestyrelsip qularnaassavaa.

§ 19. Kommunalbestyrelsi nunaminertani kommunimut pilersaarummi inaarutaasumik akuerineqarsimasumi pineqartuni sumiiffiup ilaannik aalajangersimasunik immikkoortitsisinnaavoq aammalu kommunimut pilersaarut naapertorlugu sumiiffiup ilaanut aalajangersimasumut aalajangersagaliorsinnaalluni, tak. §§ 15-17.

Imm. 2. Kommunimut pilersaarutip naammassineqarnissaata qularnaarneqarnissaa pisariaqarpat, kommunalbestyrelsi § 13, imm. 2, litra b malillugu sumiiffiup ilaanut aalajangersimasumut aalajangersagaliortitsissaaq. Illuliortiternerit sanaartornerillu, eriagisarialinnik aalajangersaanerit il.il. kommunimut pilersaarutip tunngavigisaannut imarisaanullu naapertuuttumik suliarineqarnissaat kommunimut pilersaarutikkut qularnaarneqassaaq.

Imm. 3. Illuliortiternissanut sanaartornissanulluunniit annertuunut imaluunniit pingaarutilinnut nunaminertamik atuinnissamik akuersissummik tunniussinnginnermi aammalu ineqarfinnik annertuunik pingaarutilinnilluunniit isaterilinnnginnermi, sumiiffiup ilaani aalajangersimasumi nunaminertanik atuinnermut illuliortiternermullu maleruagassiisunik sukumiisunik aalajangersagaqarnissaa, tak. § 13, imm. 2, nr. 3, litra b, kommunalbestyrelsip isumannaassavaa.

Imm. 4. Sanaartugassatut aalajangiussat kommunimut pilersaarutip tunngavigisaannut imarisaanullu naapertuuttumik suliarineqarnissaat, sumiiffiup ilaanut aalajangersimasumut aalajangersakkani qularnaarneqassaaq.

§ 20. Kommunimut pilersaarutip allannguuteqartinnerani (kommunimut pilersaarummut tapiliussaq) §§ 15, 16 aamma 17 taamatuttaaq atorineqassapput.

Imm. 2. Kommunimut pilersaarummut tapiliussaq taamaallaat sumiiffiup ilaanut aalajangersimasumut ataatsimut atuussimappat § 15, imm. 3 naapertorlugu piffissaliussaq sapaatit akunnerinut 6-nut sivikillisinneqarsinnaavoq.

Imm. 3. Pilersaarutip siunertaa inatsisitigullu sunniutai, tak. §§ 21, 22 aamma 23, § 13, imm. 2 nr. 1 naapertorlugu nassuiaammi takuneqarsinnaassapput.

Kommunimut pilersaarutit utaqqiisaasumik aamma inaarutaasumik inatsisitigut sunniutai

§ 21. Kommunalbestyrelsi kommunimut pilersaarutip naammassineqarnissaanut sulissaaq, ilanngullugu nunaminertanik atugassiinerni, tak. §§ 26 aamma 27.

Imm. 2. Kommunimut pilersaarutip aalajangersakkanut immikkoortua, tak. § 13, imm. 2, nr. 3, innuttaasunut inatsisitigut pisussaaffliivoq.

§ 22. Kommunimut pilersaarutip imaluunniit kommunimut pilersaarummut tapiliussap inaarutaasumik akuerineqarneranik § 17 malillugu tamanut nalunaaruteqarnerup pereernerani, § 30 naapertorlugu immikkut akuersissuteqartoqarsimatinnagu, inatsisinik imaluunniit pissutsinik piviusunik tunngaveqarluni kommunimut pilersaarutip aalajangersakkanut immikkoortuanut imaluunniit nunaminertanik tunniussinermi atugassarititaasunut, tak. § 29, akkerliusunik pilersitsisoqassanngilaq.

§ 23. Kommunimut pilersaarutissatut imaluunniit kommunimut pilersaarummut tapiliussassatut siunnersuutip tamanut saqqummiunneqareernerani nunaminertat, illut sanaartukkallu siunnersuummi pineqartut illuliorfigineqassanngillat allatigulluunniit pilersaarutip inaarutaasup imarisaanut sioqqutsisutut isikkoqarsinnaasumik iluaqutiginiarneqassanatik.

Imm. 2. § 15, imm. 3 naapertorlugu oqaaseqaatinut allannguutissatullu siunnersuutitut saqqummiussinissamut piffissaliussap naareernerani piffissaagallartillugu akerliliissutinik tigusaqartoqarsimanngippat kommunalbestyrelsi nunaminertap siunnersuummi pineqartup illuliorfigineqarnissaa imaluunniit allatigut pilersaarut naapertorlugu iluaqutigineqarnissaa akuerisinnaavaa.

Imm. 3. Imm. 1-imi aamma 2-imi aalajangersakkat pilersaarutissatut siunnersuutip tamanut nalunaarutigineqarnissaata tungaanut atuutissapput, tak. § 17, taamaattorli siunnersuutip saqqummiunneraniit naatsorsukkamik sivilisunerpaamik ukiumi ataatsimi.

§ 24. § 13, imm. 2 nr. 3 naapertorlugu sumiiffiup ilaanut aalajangersimasumut aalajangersagaliornikkut pissutsinik pinngitsoortinneqarsinnaasunik pilersitsisoqarnissaa kommunalbestyrelsip inerteqqutigisinnaavaa.

Imm. 2. Inerteqquteqarneq ukioq ataaseq tikillugu sivilisussuseqarsinnaavoq ataasiaannarlunilu pisinnaalluni. Inerteqquteqarneq tamanut nalunaarutigineqassaaq.

§ 25. Kommunilbestyrelsi isumaqatiginiareerlugu Naalakkersuisut kommunimut pilersaarutip naammassineqarnissaanut piffissaliussanik aalajangersaasinnaavoq.

Kapitali 6

Nunaminertanik atugassanngortitsisarneq

Nunaminertat atorineqarnissaannut akuersissut

§ 26. Nunaminertanut oqartussaasunit akuersisoqarsimatinnagu nunaminertaq sunaluunniit nalinginnaasumik atorineqassanngilaq atorineqalissaniluunniit.

Imm. 2. Nunaminertanut oqartussaasunit akuersisoqarsimatinnagu nunaminertap suulluunniit atorineqarnera allanngortinneqassanngilaq.

Imm. 3. Nunaminertamik atugassanngortitsineq inummut akuerineqartumut tunngatitaavoq. Nunaminertamut pisinnaatitaanermik tunniussineq sunaluunniit nunaminertanut oqartussaasumit akuerineqaqqaassaaq.

Imm. 4. Nunaminertamik atuisinnaatitaaneq niuerutigineqassanngilaq.

§ 27. Kommunilbestyrelsi kommuneqarfimmi pineqartumi nunaminertanut oqartussaasuvoq aammalu kommuneqarfimmi nunaminertat atorineqarnissaannik akuersisartuulluni.

Imm. 2. Kommunit aggornerisa avataanniittuni atuisinnaatitaaneq Naalakkersuisunit nalunaarutigineqassaaq.

Imm. 3. Kommunilbestyrelsi nunaminertanik sanaartorfissanik nuna tamakkerlugu pilersaarusiornermut pingaaruteqartunik atugassiilluni akuersissuteqannginnermini Naalakkersuisut akuersissutaannik pissarsiniaqqaassaaq.

Imm. 4. Sanaartugassanut inatsisit aamma nuna tamakkerlugu pilersaarusiornermut malitassiat il.il. naapertorlugit nunaminertanik atuinissamut akuersissutit Naalakkersuisunit tunniunneqarsinnaapput.

§ 28. Nunaminertamik atuisinnaatitaaneq qinnuteqartoqarneratigut inunnut, suliffeqarfinnut, ingerlatseqatigiiffinnut, peqatigiiffinnut assigisaannulluunniit tunniunneqarsinnaavoq.

§ 29. Nunaminertamik atuisinnaatitaanerup nalunaarutigineqarnerani piumasaqaatit atugassarititaasullu § 1-mi siunertanut taaneqartunut iluaqutaasut piumasarineqarsinnaapput. Piumasaqaatit atugassarititaasullu aalajangersarneqartut imatut imaqaassapput, sanaartugassatut aalajangiussat kommunimut pilersaarutip tunngavigisaannut imarisaanullu naapertuuttumik suliarineqarnissaat qulakkeerneqassalluni.

Imm. 2. Atuisinnaatitaaneq piffissamut killilernerqarsinnaavoq.

Imm. 3. Atuisinnaatitaaneq inatsisinut akertilusumik atorineqarpat atorunnaarsinneqarsinnaavoq.

Immikkut ittumik akuersinerit

§ 30. Immikkut ittumik akuersineq sumiiffiup ilaanut aalajangersimasumut kommunimut pilersaarummi aalajangersakkat tunngaviinut akertiluungippat, sumiiffiup ilaanut aalajangersi-masumut aalajangersakkat sukumiisut saneqqunneqarnissaannut immikkut ittumik akuersissuteqarnerit kommunalbestyrelsimit nalunaarutigineqarsinnaapput.

Imm. 2. Sumiiffiup ilaanut aalajangersimasumut aalajangersagaq, Namminersornerullutik Oqartussani naalagaaffimmiluunniit oqartussaasumik isumaqatigiissuteqarnikkut aalajangersarneqarsimasoq, aatsaat oqartussaasup pineqartup akuersineratigut saneqqunneqarsinnaavoq.

Imm. 3. Imm. 1-imi pineqartunit annertunerunik nikingassuteqartitsinerit aatsaat sumiiffiup ilaanut aalajangersimasumut pineqartumut nutaamik pilersaarusiornikkut pisinnaapput.

Imm. 4. Aalajangersakkat sanilinut allanulluunniit eqqaamiunut pingaarutillit saneqqunneqarnissaannut immikkut ittumik akuersinerit, sanilit kommunalbestyrelsimit tusarniarneqarneranniit minnerpaamik sapaatit akunneri marluk ingerlareerpata, aatsaat nalunaarutigineqarsinnaapput. Tusarniaanermi sumut immikkut ittumik akuerineqanissamik qinnuteqartoqarnersoq aammalu oqaaseqaatigiumasat sivikinnerpaamik sapaatit akunnerinik marlunnik piffissalius-sap iluani nassiunneqassasut nalunaarutigineqassaaq.

Pinngitsaaliisummik taarsiinertalimmik arsaarinnissuteqartarnek aamma tiguisarneq

§ 31. Sumiiffiup ilaanut aalajangersimasumut kommunimut pilersaarummi aalajangersakkat, tak. § 13, imm. 1, nr. 3, naammassineqarnissaannut pisariaqarpat, pigisanik aalaakkaasunik arsaarinnissuteqartarnek pillugu inatsimmi aalajangersakkat naapertorlugit pinngitsaaliisummik taarsiinertalimmik arsaarinnissuteqarnissaq aallartinneqarsinnaavoq.

Imm. 2. Suliassaqarfinni Namminersornerullutik Oqartussat ataanniinngitsuni pinngitsaaliisummik taarsiinertalimmik arsaarinninneq pineqarpat, pigisanik aalaakkaasunik arsaarinnissuteqartarnek pillugu Kalaallit Nunaannut inatsimmi aalajangersakkat atuutissapput.

§ 32. Sumiiffiup ilaani aalajangersimasumi kommunalbestyrelsi akuersiteqqaarnagu illunik imaluunniit sanaartukkanik isaterisoqassanngitsoq, allannortiterisoqassanngitsoq, allatigulluunniit allannortitsisoqassanngitsoq aalajangerneqarsimappat, akuersissummillu tunniussinissaq itigartinneqarpat, piginnittup piumasarisinnaavaa taarsiissuteqarfigalugu kommunip tamakkiisumik ilaannaasumilluunniit tigussagaa.

Imm. 2. Taamaattorli kommuni aatsaat imm. 1 naapertorlugu tiguisussaataitaavoq, illuliortiterfiup aningaasatigut iluaqutigineqarsinnaanerata aamma illuliortiterfiup assingusumik atorineqartup kisiannili

isaterinissamik aamma allanngortiterinissamik inerteqquteqarnermi pineqartunut ilaanngitsup aningaasatigut iluaqutigineqarsinnaanerata akornanni annertuumik nikingasoqarpat.

Imm. 3. Isumaqatigiilluni aaqqiisoqarsinnaanngippat *imm. 1* naapertorlugu taarsiissuteqarnissaq pinngitsaaliisummik taarsinertalimmik arsaarinnissuteqartarnermut ataatsimiititaliamit aalajangersarneqassaaq, tak. pigisanik aalaakkaasunik arsaarinnissuteqartarneq pillugu Inatsisartut inatsisaat.

Kapitali 7

Illuliornermik oqartussaasut

§ 33. Naalakkersuisut illuliornermik oqartussaaneq pillugu aamma illuliassat sanaartugassallu allat napparnissaat, sananeqarnissaat aamma ilusilersornissaat pillugit aalajangersaassapput.

§ 34. Kommunalbestyrelsit maleruagassat Naalakkersuisunut isumaqatigiissutigineqarsimasut naapertorlugit illuliornermik oqartussaannermt atatillugu oqartussatut suliarinninnermt akitsuummik akileeqqusisinnaapput.

§ 35. Illuliornermik oqartussaasut najoqqutassat peqqussut naapertorlugu atulersinneqarsimasut unioqutinneqarsimanersut misissorniarlugu, eqqartuussisut aalajangiitnngikkaluarlugit, inuup nammineerluni illuutaanut isernissartik piumasarisinnaavaat.

Imm. 2. Piumasarineqartillugu kinaassutsimik uppenarsaat takutinneqassaaq.

Kapitali 8

Aalajangersakkat ataatsimoorussat

Naammagittaalliuutit

§ 36. Naalakkersuisut pilersaarutitut aamma nunaminertanut naammagittaalliuuteqartarfik pilersissavaat.

Imm. 2. Pissutsit peqqussummi matumani pineqartut pillugit imaluunniit maleruagassat inatsisartut peqqussutaat manna naapertorlugu aalajangersagaasut naapertorlugit kommunalbestyrelsip aalajangiinera, pissutsit inatsisut tunngassuteqarpata, pilersaarutitut aamma nunaminertanut naammagittaalliuuteqartarfimmut suliaannngortinneqarsinnaapput. Taamaattorli pinngitsaaliisummik taarsinertalimmik arsaarinnissuteqartarneq pillugu aalajangiinerit, tak. §§ 31 aamma 32, pilersaarutitut aamma nunaminertanut naammagittaalliuuteqartarfimmut suliaannngortinneqarsinnaanngillat.

Imm. 3. Naammagittaalliuutaasoq kommunalbestyrelsip aalajangiinnerminik nalunaaruteqarneraniit kingusinnerpaamik sapaatit akunneri 8-it qaangiunneranni tunniunneqassaaq.

Imm. 4. Kommunalbestyrelsip akuersissutaanik tigusisoq naammagittaalliortoqarneranik kommunalbestyrelsimiit nalunaarfigineqassaaq.

Imm. 5. Naammagittaalliuuteqartarfiup aalajangiineri allaffissornikkut oqartussanut allanut suliaannngortinneqarsinnaanngilaq.

§ 37. Pilersaarutitut aamma nunaminertanut naammagittaalliuuteqartarfiup naammagittaalliuuteqarneq akuersissutissanut inerteqqutissanulluunniit kinguartitsinermik kinguneqartilersinnaavaat, naammagittaalliuuteqartarfiup aalajangiinissaata tungaanut imaluunniit naammagittaalliuuteqartarfiup allatut aalajangernissaata tungaanut.

§ 38. Pilersaarutitut aamma nunaminertanut naammagittaalliuuteqartarfimmi suliamut attuumassuteqanngitsumik, pingasunik ilaasortalimmik Naalakkersuisut pilersitsissapput.

Naalakkersuisup pilersaarusiornermut aamma nunaminertat atorineqarnerannut akisussaasuusup inassuteqarneratigut siulittaasoq tassungalu sinniisissaq toqqarneqassapput. Siulittaasoq pilersaarusiornermut nunaminertallu atorineqarnerinut inatsisinik immikkut ilisimasaqartuussaaq, imaluunniit inatsisilerituutut soraarummeersimasuussalluni. Naammagittaalliuuteqartarfimmut ilaasortaq ataaseq taassumalu sinniisissaa Kalaallit Nunaanni inatsisartut inassuteqarnerisigut Naalakkersuisunit toqqarneqartassaaq, aammalu naammagittaalliuuteqartarfimmut ilaasortaq ataaseq taassumalu sinniisissaa KANUKOKA-p inassuteqarneratigut Naalakkersuisunit toqqarneqartassaaq.

Imm. 2. Pilersaarutinut aamma nunaminertanut naammagittaalliuuteqartarfimmi ilaasortat ilaasortaanerminnut peqatigitillugu Naalakkersuisunit ilaasortaassanngillat.

Imm. 3. Pilersaarutinut aamma nunaminertanut naammagittaalliuuteqartarfimmi piffissaq qinigaaffusoq Inatsisartut piffissaq qinigaaffigisaat malittassavaa. Inatsisartunut nutaamik qinersinerup kingorna naammagittaalliuuteqartarfimmi ilaasortassanik nutaanik qinersinissap tungaanut, naammagittaalliuuteqartarfimmi ilaasortat atuuttassapput.

Imm. 4. Pilersaarutinut aamma nunaminertanut naammagittaalliuuteqartarfik suliamut ilisimasalinnik peqataatitaqarsinnaavoq.

Imm. 5. Pilersaarutinut aamma nunaminertanut naammagittaalliuuteqartarfiup atuunneranut Naalakkersuisut sukumiineruusunik aalajangersaasinnaapput.

§ 38a. Naammagittaalliuuteqartarfiup atortorissaarutit pisariaqartitai Naalakkersuisunit atugassiissutigineqassapput, aammalu allattoqarfittut ikiorsiinerit pisariaqartinneqartut isumagissallugit.

Imm. 2. Naammagittaalliuuteqartarfiup sulinerani aningaasartuutissat, tassunga ilanngullugit suliamut atatillugu siulittaasup ilaasortallu akiliutigigallagaannut, kiisalu allaffissornermut il.il. aningaasartuutit Naalakkersuisunit akilerneqartassapput. Pilersaarutinut aamma nunaminertanut naammagittaalliuuteqartarfimmut ilaasortat Inatsisartunut Naalakkersuisunullu il.il. ilaasortat akissarsiaqartinneqarnerat il.il. pillugu Inatsisartut inatsisaanni maleruagassat malillugit akissarsiaqartinneqassapput, ullormusiaqartinneqassapput aammalu angalanermut aningaasartuutitut taarsiiffigineqartassallutik.

Aqutsinermut aalajangersakkat

§ 39. Naalakkersuisut pilersaarusiornermut oqartussaasua aamma kommunip pilersaarusiornermut oqartussaasua peqqussut manna malillugu pilersaarusiornerminni nakkutilliiniarlutik kiisalu uuttortaniarlutik allanillu teknikkikkut piareersaniarlutik, atuisinnaatitaasumut piginnittumulluunniit siumut nalunaaruteqareerneremmikkut, nunaminertanut tamanut aamma pigisamut aalaakkaasumut inuup nammineq pigisaanut sumulluunniit takusaanissartik piumasarisin-naavaat.

Imm. 2. Piumasarineqartillugu kinaassutsimik uppernarsaat takutinneqassaaq.

Nakkutilliineq

§ 40. Kommunalbestyrelsip Inatsisartut peqqussutaata malinneqarnissaat nakkutigissavaa.

Imm. 2. Kommunalbestyrelsip Inatsisartut peqqussutaat manna, maleruagassat Inatsisartut peqqussutaat manna naapertorlugu aalajangersagaasut kiisalu aalajangersakkat § 44, imm. 3 naapertorlugu atuutsiinnarneqartut malillugit peqqussutaasut inerteqqutaasullu eqquutsinneqarnissaat aamma atugassarititaasut akuersissutini aalajangersagaasut malinneqar-nissaat nakkutigissavai.

§ 41. Naalakkersuisut inatsisinik unioqutitsisoqartoq paasigunikku, Naalakkersuisut pissutsit taakkua inatsisinut naapertuuttunngorteqqullugit kommunalbestyrelsimut peqqussutigisinnaavaat. Naalakkersuisut aalajangersinnaavaat inatsisinut naapertuuttunngortitsineq pissutsip aaqqinneratigut imaluunniit inatsisitigut iluarsiinikkut pissanersoq.

Imm. 2. Suliaq inatsisinik unioqutitsisoq suliarineqareersimappat aammalu pilersaarusiorneq eqqarsaatigalugu kikkullu tamarmik nunaminertanik aqutsinermut peqataatinneqartarnissaannut tunngasut eqqarsaatigalugit akerliunngippat, Naalakkersuisut kommunimut pilersaarusiorneq aamma immikkut ittumik akuersissuteqartarneq pillugit maleruagassat atuutsinngit-soorsinnaavaat.

Pineqaatissiissutit

§ 42. Sukkulluunniit illumik piginnittup imaluunniit nunaminertamik atuisup pissutsit inatsimmik unioqutitsisut iluarsinissaat pisussaaffigaa.

Imm. 2. Piginnittup atuisulluunniit pissutsit inatsimmik unioqutitsisut iluarsinissaat pillugu peqqussutigineqartoq malinngippagu, eqqartuussisut aqutigalugit piffissaq aalajangiussaq naatinnagu pillaatit akiligassiinerit ingerlaannartut atorlugit pinngitsaaliissuteqarnikkut pissutsit unioqutitsisut iluarsinissaannik pisussaaffilerneqarsinnaavoq.

Imm. 3. Pissutsinik inatsimmik unioqutitsisunik iluarsiinissaq pillugu eqqartuussissutikkut peqqussutaasoq, eqqartuussissummi piffissaliussap iluani malinneqarsimangippat, akiligassiissutinillu akiliisitsiniarnikkut pinngitsaaliissuteqarnerit peqqussutip malinneqarneranik kinguneqarsorinanngippata, pilersaarusiornermik oqartussaasut piginnittumut akiligassanngorlugu pissutsit iluarsineqarnissaannut pisariaqartut isumagisinnaavaat.

§ 43. § 26, imm. 1 aamma 2-imik unioqutitsineq aammalu § 24 aamma § 42 naapertorlugit peqqussissummik inerteqqummilluunniit malinninnginneq pillaammik akiliisitaasussanngortitsinermik kinguneqarsinnaavoq.

Imm. 2. Unioqutitsisut tassaappata Namminersornerullutik Oqartussat, kommuni imaluunniit kommunit ataatsimoorfiat, naalagaaffiup oqartussaasua imaluunniit pisussaataasooq pisinnaatitaasorlu alla, suliffeqarfik il.il. akiliisitaasussanngortitsinikkut akisussaatinneqarsinnaavoq.

Kapitali 9

Atuutilersitsinissamut aalajangersakkat

§ 44. Inatsisartut peqqussutaat ulloq 1. januar 2009 atuutilerpoq.

Imm. 2. Tamatuma peqatigisaanik atorunnaarsinneqarput:

- 1) Nunaminertat atorineqarnerat pilersaarusiornarlugu pillugit Inatsisartut peqqussutaat nr. 6, 19. december 1986-imeersoq.
- 2) Nuna tamakkerlugu pilersaarusiornermut udvalgip suleriaasissaa pillugu Namminersornerullutik Oqartussat nalunaarutaat nr. 5, 21. april 1981-imeersoq.
- 3) Nunaminertat atorineqartarnerat pilersaarusiornarfigineqartarnerallu pillugit Namminersornerullutik Oqartussat nalunaarutaat nr. 23, 18. november 1992-imeersoq.

Imm. 3. §§ 13 aamma 27 naapertorlugit nunaannarmi nunaminertat aamma pilersaarusiorneq pillugit oqartussaanerup tunniunneqarnera aatsaat ulloq 1. januar 2011 atuutilissaaq.

Imm. 4. Maleruagassat atugassarititaasullu nunaminertanik atuneq aamma pilersaarusiorneq pillugit Inatsisartut peqqussutaat nr. 6, 19. december 1986-imeersoq naapertorlugu atuutilersinneqarsimasut

atuutiinnassapput, maleruagassanit inatsisartut peqqussutaat manna imaluunniit imaluunniit Inatsisartut peqqussutaat allat naapertorlugit aalajangersarneqartunit taarserneqarnissaasa atorunnaarsinneqarnissaasaluunniit tungaanut.

Kapitali 10

Ikaarsaarnermut aalajangersakkat

§ 45. Kommunalbestyrelsi § 30, imm. 1-4 naapertorlugit sumiiffinnut pilersaarutit § 44, imm. 4 malillugu atuutsiinnarneqartut imaluunniit sumiiffinnut pilersaarutit Inatsisartut peqqussutaat nr. 6, 19. december 1986-imeersumi § 26, imm. 2 malillugu atuutsiinnarneqartut, saneqqunneqarnissaannik immikkut akuersissuteqarnissamik periarfissaqarpoq.

§ 46. Pilersaarutitut aamma nunaminertanut naammagittaalliuuteqartarfiup pilersinneqarnissaata tungaanut kommunalbestyrelsip pissutsinut peqqussummi matumani pineqartunut ilaasunut tunngasunik aalajangiinerini apeqquutit inatsisinut tunngasortai Naalakkersuisunut naammagittaalliuutigineqarsinnaapput.

Imm. 2. Naammagittaalliorsinnaapput

- 1) kinaluunniit aalajangiinerimi aalajangiiffigineqartoq,
- 2) kinaluunniit suliap inerneranik imminut tunngatillugu imaluunniit annertuumik soqutigisaqartutut naatsorsuutigineqartoq.

Imm. 3. Naammagittaalliuut kommunalbestyrelsip aalajangiinerminik nalunaaruteqarnerata kingorna kingusinnerpaamik sapaatit akunneri 8-it qaangiunnerini saqqummiunneqassaaq.

Namminersornerullutik Oqartussat, ulloq 5. december 2008

Hans Enoksen

/

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut